



Llywodraeth Cymru
Welsh Government

Adolygiad Tystiolaeth o fodelau cyfiawnder ieuenctid a chanlyniadau ar gyfer pobl ifanc ledled y Deyrnas Unedig

Crynodeb

Dyma gyfle cyffrous i ymgymryd â lleoliad gwaith ar brosiect ar ran Llywodraeth Cymru. Mae nifer o interniaethau ar gael i weithio ar dystiolaeth i helpu i lywio'r gwaith o ddatblygu ymryiadau polisi. Bydd yr ymgeisydd llwyddiannus yn gweithio'n agos gyda swyddogion Llywodraeth Cymru a rhanddeiliaid i ymchwilio i rychwant amrywiol o allbynnau ymchwil, ac i'w datblygu, a bydd yn cefnogi Llywodraeth Cymru yn ei phroses ymchwil. Caiff yr ymgeisydd gyfle i roi ei sgiliau ymchwil ar waith mewn amgylchedd polisi, yn ogystal â meithrin ei sgiliau cyffredinol ymhellach, a gwella ei wybodaeth am ymchwil y tu allan i'r byd academiaidd.

Y Sefydliad

Llywodraeth Cymru yw Llywodraeth ddatganoledig Cymru ac mae'n gyfrifol am yr economi, addysg, iechyd a GIG Cymru, busnes, gwasanaethau cyhoeddus a'r amgylchedd yng Nghymru.

Yn benodol, bydd yr interniaeth wedi'i lleoli yn y gwasanaethau Gwybodaeth a Dadansoddi (KAS). Mae KAS yn casglu, dadansoddi a chyflwyno ymchwil a data ar gyfer llunwyr polisi a'r cyhoedd yn gyffredinol, yn unol â safonau proffesiynol. Maen nhw'n cynnig tystiolaeth annibynnol i ddeall, datblygu, gweithredu, monitro a gwerthuso polisïau'r llywodraeth. Mae KAS hefyd yn cefnogi cydweithwyr polisi i ddatblygu, gweithredu a chyflawni polisïau.

Yr Interniaeth

Bydd yr intern yn rhan o dîm sy'n cefnogi'r maes polisi datganoli cyfiawnder i helpu i ddarparu tystiolaeth a gwaith dadansoddi i gynorthwyo i baratoi a chynllunio ar gyfer datganoli swyddogaethau cyfiawnder i Gymru. Bydd yr interniaeth yn gyfle cyffrous i weithio wrth galon Llywodraeth Cymru. Bydd gofyn gweithio'n agos gyda swyddogion polisi ac ymchwilwyr cymdeithasol a bydd cyfle hefyd i roi sgiliau ymchwil ar waith mewn amgylchedd polisi, datblygu sgiliau cyffredinol ymhellach (ee llunio adroddiadau neu roi cyflwyniadau), a gwella gwybodaeth am bolisïau.

Bydd modd i'r ymgeisydd llwyddiannus fanteisio ar y cyfleoedd datblygu a gynigir gan Lywodraeth Cymru yn ganolog, a allai gynnwys mentora, cysgodi, cymorth gan gymheiriaid a hyfforddiant.

Caiff interniaid fudd o weithio'n agos gyda Llywodraeth Cymru gan gynnwys:

- Meithrin dealltwriaeth well o'r byd y tu allan i'r byd academiaidd a chynyddu eu cyfle o gael eu cyflogi, gan ddefnyddio eu gwybodaeth a'u sgiliau i gyfrannu at waith Llywodraeth Cymru.
- Gall cydweithwyr yr intern yn Llywodraeth Cymru gynnig goleuni pellach ar ei brosiect PhD, a all gyfrannu at lwyddiant y thesis, yn ogystal â chyfleoedd rhwydweithio o fewn y maes polisi sy'n gysylltiedig â'r maes ymchwil.
- Gwybodaeth a sgiliau trosglwyddadwy
- Sgiliau rheoli amser
- Sgiliau llunio adroddiadau

Y Prosiect

Y cefndir

I helpu â'i hymrwymiad i fynd ar drywydd yr achos dros ddatganoli cyfiawnder a phlisma, mae Llywodraeth Cymru am fynd ati i ddatblygu a deall y dystiolaeth sy'n ymwneud â datganoli cyfiawnder ieuenctid, y gwasanaeth prawf a phlisma. Mae'r math hwn o waith yn heriol a chymhleth ac yn gofyn am sylfaen dystiolaeth gynhwysfawr i helpu i ddatblygu polisiâu a chynnal trafodaethau gyda rhanddeiliaid ehangach wrth ystyried a chyflwyno modelau datganoli ar gyfer y dyfodol. Yn hynny o beth, mae adolygu a chyfosod y dystiolaeth sy'n bodoli eisoes yn elfen bwysig o safbwynt gwaith y dyfodol.

I lywio datblygiadau yn y dyfodol o ran cyfiawnder ieuenctid yng Nghymru, mae'r prosiect ymchwil hwn yn canolbwyntio ar gasglu tystiolaeth sy'n bodoli eisoes yn ymwneud â'r gwahanol fodelau cyfiawnder ieuenctid ledled y DU. Mater o ddiddordeb arbennig yw sut y gall gwahanol fodelau o gyflawni cyfiawnder ieuenctid effeithio ar ganlyniadau i bobl ifanc sy'n ymwneud â gwasanaethau cyfiawnder ieuenctid.

Er mwyn cyflawni'r prosiect hwn, mae'r interniaeth yn debygol o gynnwys:

- Trafod â swyddogion polisi i ddeall y bylchau yn y dystiolaeth ac i ddatblygu cwestiynau ymchwil
- Adolygu'r dystiolaeth sy'n bodoli eisoes gan gynnwys gwerthusiadau, ymchwil academiaidd a llenyddiaeth lwyd sy'n amlinellu modelau cyfiawnder ieuenctid presennol y DU a sut y maent yn trosi'n ganlyniadau i bobl ifanc.
- Adolygu'r data cyhoeddus sy'n ymwneud â rhoi cyfiawnder ieuenctid ar waith ledled y DU
- Cyfweiliadau ansoddol posibl gydag arweinwyr cyfiawnder ieuenctid ledled y DU

Bydd y prosiect yn dwyn yr wybodaeth hon ynghyd i roi trosolwg o'r dystiolaeth ynglŷn â'r gwahaniaethau yn y ffordd y mae gwasanaethau cyfiawnder ieuenctid yn cael eu rhoi ar waith ledled y DU, a beth yw canlyniadau'r gwahanol fodelau hyn i bobl ifanc. Bydd hefyd yn nodi'r hyn sy'n galluogi ac yn rhwystro'r gwaith cyflawni.

Canlyniadau disgwyliedig y prosiect:

- Adroddiad sy'n adolygu ac yn cyfosod y dystiolaeth bresennol, gan ganolbwyntio ar roi cyfiawnder ieuenctid ar waith ledled y DU
- Cyflwyno'r canfyddiadau i'r timau polisi perthnasol

- Cyhoeddi adroddiad ymchwil ar wefan Llywodraeth Cymru

Cyfrifoldebau a gofynion yr interniaeth

Bydd yr interniaeth yn para am gyfnod o hyd at dri mis. Disgwylir i fyfyrwyr llawn amser gamu'n ôl o'u PhD i ganolbwyntio ar yr interniaeth am ei gyfnod, yn unol â chanllawiau ESRC ([Canllaw Cyllido Ôl-raddedig ESRC tud. 27](#)). Rydym yn annog myfyrwyr rhan-amser i wneud cais.

Rhagwelir y bydd yr ymgeisydd llwyddiannus yn gweithio mewn ffordd hybrid rhwng y cartref ac un o swyddfeydd Llywodraeth Cymru yn ystod yr interniaeth. Gall hyn newid, gan ddibynnu ar bolisi Llywodraeth Cymru. Bydd unrhyw newidiadau i'r trefniadau gweithio yn cael eu trafod ag ymgeiswyr llwyddiannus.

Bydd yr interniaeth yn para am gyfnod o 3 mis amser llawn, neu'r hyn sy'n gyfwerth â hynny fel trefniant rhan-amser. Ar gyfer myfyrwyr sydd wedi'u cofrestru yn rhan-amser, mae'r interniaeth hon ar gael yn rhan-amser dros gyfnod hwy (o leiaf 3 diwrnod yr wythnos waith), i'w drafod rhwng Llywodraeth Cymru a'r ymgeisydd llwyddiannus. Os hoffech gael eich ystyried ar sail ran-amser, nodwch eich dewis oriau gwaith ar y ffurflen gais.

Manyleb myfyriwr

Rhaid bod gan y myfyriwr:

- Y gallu i gynnal trafodaethau â thimau polisi i ddeall eu hanghenion ac i gynnal ymchwil desg ar ffactorau perthnasol.
- Sgiliau cadarn o ran adolygu llenyddiaeth a gwerthuso tystiolaeth, gan gynnwys y gallu i gyfosod ystod eang o dystiolaeth.
- Y gallu i gynllunio a chynnal cyfweiliadau â rhanddeiliaid a dadansoddi data ansoddol.
- Y gallu i werthuso canfyddiadau ymchwil a'u cymhwyso i gyd-destun polisi Cymreig.
- Y gallu i lunio dogfennau cryno, wedi'u hysgrifennu'n dda, gan gyflwyno tystiolaeth gymhleth mewn fformat hygyrch.

Dyddiad dechrau'r interniaeth

Yn gynnar yn 2026 (yr union ddyddiad i'w drafod). Efallai y bydd rhywfaint o hyblygrwydd gan ddibynnu ar amgylchiadau'r unigolyn.

Cyllido a chostau

Gellir talu costau teithio rhesymol i fyfyrwyr nad ydynt fel arfer wedi'u lleoli yng Nghaerdydd. Dylai ceisiadau fod yn gyson â chanllawiau Ysgol Graddedigion Gwyddorau Cymdeithasol Cymru. Ni fydd ceisiadau gan fyfyrwyr sydd angen cyllid ychwanegol ar gyfer teithio a llety yn cael eu trin yn llai ffafriol. Os oes gennych unrhyw ymholiadau am hyn, cysylltwch â Katy Marrin Katy.Marrin001@llyw.cymru a Jo Coates Joanne.Coates@llyw.cymru.

Diogelwch

Mae gweithdrefnau fetio Llywodraeth Cymru (sy'n berthnasol i staff dros dro yn ogystal â staff parhaol) yn cynnwys llenwi ffurflen gais gwiriad y Safon Ddiogelwch Safonol ar gyfer Personél (BPSS) a Holiadur Diogelwch at ddiben fetio diogelwch.

Mae'r broses hon yn gofyn i'r ymgeisydd gyflwyno 3 math gwreiddiol o ddogfen adnabod. Dylai un o'r rhain fod yn ddogfen â llun (pasbort, trwydded yrru newydd), dylai un ddogfen ddangos y cyfeiriad presennol, a gallai'r trydydd math fod yn fil cyfleustodau, tystysgrif geni, P45 neu P60.

Gofynion cenedligrwydd

I fod yn gymwys ar gyfer interniaeth ar y cynllun hwn, rhaid bodloni [rheolau cenedligrwydd y Gwasanaeth Sifil](#). Gwnewch yn siŵr eich bod yn gymwys cyn gwneud cais. Ni fydd y rhai nad ydynt yn bodloni'r meini prawf cymhwysedd yn gallu ymgymryd â lleoliad.

Ymholiadau

Dylid cyfeirio unrhyw ymholiadau am y swydd neu'r broses ymgeisio at Tom.Cartwright@llyw.cymru

Hysbysiad preifatrwydd

<https://www.llyw.cymru/hysbysiad-preifatrwydd-llywodraeth-cymru>